

四庫全書

史部

欽定四庫全書

史部

江西通志卷一百六

詳校官監察御史_臣范衷

檢討_臣德生覆勘

總校官知縣_臣楊懋珩

校對官中書_臣石鴻勳

謄錄監生_臣羅佑湘

欽定四庫全書

江西通志卷一百六

方技

儒先之道旁兼游藝教統乎同學通乎類類不一方
皆理所寄每有神授匪云私智星躔推命堪輿測地
惟卜與醫吉凶攸繫術解多端勿輕末技正史稗官
歷詳載記苟肄斯業必詣其至小道可觀多能不鄙
作方技志

南昌府

漢

嚴豐字孟侯豫章人王莽時官郡主簿莽既篡位太守
河東賈萌與安成侯張普約舉兵師興之日有蜂叢
集萌車豐曉占候以為不祥萌進兵不聽會張普負
約無援遂戰死

謝承漢書

唐

崔季真洪州人家於郡西善鼓琴工繪事大歷中一夜

大雪見有老人避雪門下者神骨非常延入具麥麴以進老人曰麥稟四時之氣穀之善者沃以豉汁則彌佳又具松花酒以進老人曰花澀無味乃探懷中藥投之酒味頓美隨遺藥數丸圖一幅而去後季真出示茅山李合光合光曰此葛洪季子也季真好養生之術以故有仙緣云

安志

胡超僧洪州人聖歷中出家學道隱白鶴山微有法術自云數百歲則天使合長生藥所費巨萬三年乃成

自進藥於三陽宮則天服之以為神妙望與彭祖同
壽改元久視放超還山賞賜甚厚服藥之後三年則

天崩

朝野僉載

朱邯豫章人精於周易得京管之遺法建中初遊楚賣
卜青山人董元範母患奇病至夜即發邯為筮之得
解之上六曰君今日昃且衫服於道側伺有執弓挾
矢而過者君向求之時邑人李楚賓喜獵其時果至
元範邀之至家設酒饌留宿是夜月明如晝楚賓出

戶徘徊見一大鳥飛集舍上引喙啄屋即聞堂內叫
痛苦聲楚賓引弓射之兩發皆中其鳥飛去痛聲亦
止明日與元範四索於敗屋中得碓捏古址兩箭著
其上皆有血光取焚之母患遂平

太平廣記

李生中和末以明經應舉如長安途中遇一道士同行
言意相得因言黃白術道士曰點化神仙小術也但
世人多貪將以濟其侈故仙道祕之吾觀子性靜寡
慾似可教者今以方授子可以濟乏絕而已如遂能

不仕亦當不匱衣食得祿則弗復為如為之則貪也
仙道所不許也因手疏方授之別書藥草數種李每
遇乏絕依方為之無不成者及為南昌令復為之絕
不成矣從子智脩為沙門李以數丸與之智脩後遊
鍾陵止賣藥家燒銀得二十兩以易衣時劉仁規為
刺史方好其事為人所告幸而得免

搜神記

司馬頭陀名曦唐時人習堪輿家言歷覽洪都諸山鈴
地一百七十餘處訖今猶驗一日至奉新參百丈曰

近於湖南得一山乃一千五百善知識所居百丈曰
老僧可住否曰不可和尚骨相彼骨山也時華林覺
為首座詢之不許一見典座靈佑曰此為山主人也
後往往山連帥李景讓率衆建梵宇請於朝賜號同
慶寺天下禪學輻輳竟如其言

安志

夏主信新吳浮雲宮道士能運掌心雷治石精至今了
口石尚存凡祈晴禱雨輒應

同上

厲歸真唐末道士遊洪都信果觀見三官殿內功德塑

像是元宗時夾紵制作甚妙多被雀鴿糞穢其上歸
真遂於殿壁畫一鷄筆跡奇絕自是雀鴿無復棲止
尤能畫折竹野鵲後傳歸真於羅浮山上昇亦異矣
玉堂閑話

五代

豫章術者臨安縣錄事鍾起有子數人與錢鏐飲博起
嘗禁諸子諸子多竊從之遊豫章人有善術者望牛
斗間有王氣牛斗錢塘分也因遊錢塘占之在臨安

乃之臨安以相法隱市中陰求其人起與術者善術者私謂起曰占君縣有貴人求之市中不可得視君之相貴矣然不足當之起乃為置酒悉召縣中賢豪為會陰令術者徧視之皆不足當一日術者過起家鏐適在外來見起反走術者望見之大驚曰此真貴人也起笑曰此吾旁舍錢生耳術者召鏐至熟視之顧起曰君之貴因此人也乃慰鏐曰子骨相非常願自愛因與起訣曰吾求其人者非有所欲也直欲質

吾術耳明目去

五代史

宋

王仔昔洪州人始學儒自言遇許遜得大洞隱書豁落
七元之祕出遊嵩山能道人未來事政和中召見賜
號冲隱處士帝以旱祈雨每遣小黄門持紙求仔昔
晝日又至忽篆符其上仍細書焚符湯沃而洗之黃
門懼不肯受強之乃持去帝蓋默祝為宮妃療赤眼
者用其說一沃立愈進封通妙先生居上清寶籙宮

獻議九鼎神器不可藏於外乃於禁中建圓象徽調
閣以貯之仔昔倨傲又少戇帝嘗待以客禮故其遇
巨閹殆若童奴及林靈素有寵忌之陷以事囚之東
太乙宮旋坐言語不遜下獄死仔昔之得罪宦者馮
浩力最多未死時書示其徒曰上蔡遇冤人其後浩
南竄至上蔡被誅

宋史

僧巨然鍾陵人工山水深得佳趣知名于時每下筆如
文人學士得題賦咏詞源滾滾出於毫端比物連類

激昂頓挫無所不有於峯嶺崖竇之外下至林麓猶作卵石松柏疎筠蔓草之類相與映發而幽谿細路曲屈縈帶竹籬茅舍斷橋危棧真若山間景趣也今御府所藏一百二十有六

宣和畫譜

楊補之字無咎南昌人自號逃禪老人又號清癸長者水墨人物學李伯時梅竹松石水仙筆法清淡閑野為世六絕高宗朝屢徵不起姪季衡畫墨梅甚得家法又能作水墨翎毛同邑劉夢良亦善寫墨梅補之

錫湯正仲字叔雅後居黃巖自號閒庵善畫梅竹松石清雅如傅粉之色水仙蘭亦佳大抵宗補之而別

出新意

安志

李頗

一作坡

南昌人善畫竹氣韻飄舉落筆有生意顧所

傳於世者不多也

同上

鐸長老俗姓辜南昌人精形象術嘗為南昌劉長老相地葬其夫婦觀者殊易之久之長者孕日繁昌又為豐城李姓卜兆初啟土時鐸輒辭去且戒之曰返寺

鳴鐘始可窆棺未至偶他寺鳴鐘遂窆棺則鐸震死
於途矣李之族自後始大明初則南昌劉子南新建
趙子方豐城何野雲亦其亞也

同上

元

傅椿年字莊叟進賢人有法術能驅雷盪妖元至元丙

子以安集功授奉新尉不起

縣志

明

徐復高奉新縣崇元觀道士通法術永樂十五年省城

早復高坐七層臺上案振金牌則雷鳴手搖小旗則
電掣大雨傾盆魚蝦盈街章江水淺三尺

安志

張榮字宗禮新建人少業儒多病因精於醫療人有奇
效未嘗責報遇貧困輒施金遺粟賴以活者甚衆寧
獻王賢之舉為良醫年七十三卒胡頤庵為之銘子
升繼其職行誼尤著官教授孫元椿進士任知府元
龍亦舉於鄉

林志

沈應善字嘉言梁休文後裔其六世祖仕豫章因家焉

事親至孝親歿廬墓三年閭里稱之屢試不售一夕夢神人示曰上帝命汝活千萬人寧可守一編以自負乎既寤遂決志學醫遇蜀之韓隱庵師事焉初授素問內經諸書研究不輟徐進以導引之學及祕藏諸方三年韓別去曰九九之際遲我於我喟之麓自是名益振凡士大夫無不與之遊授以劑罔弗驗者歲癘則捐貲貯藥以濟人之求靡有倦色居旁構一舍曰來安堂諸藥餌飲食無不具備羈旅貧苦者聞

聲麇集年八十一忽語家人曰韓先生招以緘我將
逝矣尋沐浴而卒著素問箋釋二卷醫貫集補二卷
子長庚以經業補弟子員能世其學

安志

按沈應善前志誤編入唐今改正

楊節譽進賢人受學於傅椿年天順中召至京師試以
法能指揮風雨宮殿妖氣遂以蕩滅授帶俸錦衣衛
指揮使不受後不知所在相傳謂之楊法師

同上

國朝

王大國字邑郊南昌人屢舉不第患痰疾遇異人授以素問內經及祕藏諸方遂精醫學切中肯綮同里杜氏子年幼久患瘰癧大國投以二九即日平復南昌司理胡慎三左足患癰直穿脚底醫數易而癰日甚大國去敷藥止服湯劑不一月而愈巡撫蔡士英監臨鄉闈背疽大作大國為調理速愈而不作楚同時有何述樵者精於痘科人以二仙稱之並著靈跡于世

瑞州府

宋

無名相士精風鑑筠州太守聞之為徧召賓僚試其術
時曹利用為巡檢同王務本在座相者言利用後當
極貴坐客皆笑復問務本何時登第曰須巡檢入兩
府時耳客皆曰烏有是後利用以使契丹有功為閣
門使十年間列位樞府而務本適登第後為海州推

官

府志

彭攀龍字淵材新昌人工於樂律獻樂書於朝為協律

郎飭粥不給乃歸

安志

鄒王臣字元佐涉獵書傳精通五行以人之年月時日

推其壽夭禍福貴賤貧富萬不差一自言凡看命須

隨所見即談無不奇中若稍涉思慮則相去遂遠矣

著有洪範福極彞倫與肯五卷貴命四十九格行於

世

同上

陳善字德成新昌人以策授承信郎歷臨安幕監岳州

軍改江西憲幕得父建龍虎山之術鞭霆致雨每歲

旱賴其祈禱號月湖先生

同上

方子明道人也寓高安聖壽寺蘇子由贈以詩有水汞

成銀利十倍丹砂為金世無對之句

樂城集

元

周德清高安人工樂府精通音律著中原音韻虞伯生

序之

安志

潘濤上高人累世以業醫顯名至濤益著著醫學繩墨

一書其目有十一切脉二問症三斷病四辨逆順五
明標本六立治七審輕重八處方九用藥十調理行
於世

同上

曾義山一名法興上高人善占術青田劉基丞高安法
興過之語曰相公聰明絕世而器宏遠當為一代偉
人吾書盡以相贈基借觀乾象諸書法興以原本畀
之曰吾不欲留此以為家禍也後明太祖嘗問基知
所授受乃令有司為法興營居室表其墳墓

同上

明

劉侶字豫甫上高人元季瑞州路學正與高安丞劉基
奉新胡泰為友精於易卜世亂棄官家居懸棹為識
號銀河棹與人言吉凶無不立驗凡上高業陰陽術
者悉祖之洪武初以薦舉復任本學訓導著有銀河
棹外編

上高縣志

鄧詳甫高安隱士也嘗遇異人授象緯韜鈴之祕避世
不仕劉基來丞高安詳甫見而奇之基與遊盡得其

蘊論者比之圯上老人云

安志

李綱善地理為世宗營壽陵特授欽天監博士

新昌縣

志

胡任高安人醫術最精利濟甚廣著有醫方諸集

安志

姜宸進賢人以醫久寓高安頗有儒行萬歷戊子巳丑間連荒所在病疫宸施藥濟困所活良多貧者尤德

之同上

袁州府

南唐

何溥字會通袁州宜春人天資穎異善地理家言元宗
聞其賢累詔起之擢國子祭酒保大中鄒廷翊相皇
陵於牛頭山溥言不利極表諫諍忤旨謫休寧令溥
至邑即改縣基吳王墓後倚松蘿山前名真武下壇
形未幾卜地縣東南隅居馬舍前削石按太極八卦
諸圖茂林脩竹時時披襟嘯傲其間後主時復徵不
起隱芙蓉山削髮為頭陀雖假迹禪門絕不譚釋語

每誦道德經必歎曰真聖人也孔子豈欺我哉由是
專脩長生煉化之術所著論氣正訣一卷傳世

十國

春秋

臨江府

宋

鄒公新淦人寧宗時有雷擊物為產婦所觸不能上升
時鄒巫能誦解咒忽有神請曰為誦解穢咒千遍當
有以報鄒誦訖神授鞭印各一曰祈晴順印祈雨倒

印用鞭畫空雨止畫處神忽不見雷升天矣鄒平生
喜食鴨嘗過其女留殺鴨為黍時曬麥於庭天有雨
勢女欲收而後饌曰雨當無損於麥須臾大雨鄒望
空四向而畫獨庭無雨由是遠近人招之祈禱如法
用印無不立應年九十餘卒鞭印亦亡鄉人祀之玉
笥山承天宮前廟中號曰鄒公

異聞錄

吉安府

唐

劉守真善調風角楊州刺史楊行密遣將周本圖吉州
與刺史彭玕戰於象牙潭玕敗走立寨新淦楓岡聞
守真名召至軍中每逆戰守真以術厭之敵不能破
一夕劉死玕戰不利棄寨去

江南野史

宋

劉元賓連舉於鄉任潭州司李通陰陽醫藥術數真宗
試之驗賜名通真子所著有集正歷橫天卦圖神巧
萬金方註解叔和脉訣傷寒論洞天鍼灸經

安福縣

志

藍玉仲永新人精方脉預言人禍福壽夭奇中體豐龐
善飯士大夫家爭輿致之其起人痼瘵或以一劑或
因前醫所立方增減一二或亦無所增減第稍差等
分無不立效或曰其術多得之藍元初玉仲族叔父
也

安志

劉嬾富安福人少卓犖里晏氏子病危忽一道人款門
曰與錢千貫吾當治之晏委錢恣所取道人日攜百

錢飲酒家暮醉則歸忽早作呼晏辨一犬置病子前
令健夫夾持之道人坐其後默攻之病子苦甚欲起
戒夾者堅勿動夕乃罷明日又如之病脫然矣其犬
一夕垂絕嬾窩視而歎曰術則奇矣如犬何道人喜
曰仁言也復命取一新磚置犬前如前攻之犬則搖
尾去磚則墳矣更不受謝取書數卷授嬾窩去遂以

醫名世

同上

潘碧山安成人善風鑑傳與礪贈以詩有直言往往驚

四座乃使世人畏其口之句

傅與礪集

謝茂德精岐黃之術時以仙翁目之傳若金贈以詩云

同上

明

彭用光廬陵人善太素脉言多奇驗所著有體仁彙編

安志

王昂廬陵人通古今諸醫書人有危疾集郡中諸醫無能療者昂投劑立應其不可者任羣醫出計施巧不

活也嘗語人曰余每遇疾艱危未嘗不退而深思求為必活之計又曰醫以輔養元氣非與疾求勝也夫與疾求勝者非味雜辛烈性極毒猛則得效不速務速效者隱禍亦深吾寧持久緩待其自復也人有疾輒往視之不責其報詳見羅念菴墓誌

同上

周騎龍廬陵人成化間以善談祿命著名豫章尤精範圍數御史趙啟按江右威望甚著及瓜當還朝騎龍曰不然行有西北之調啟頗疑之未幾調晉臬啟問

之騎龍曰公元數一六六四會數一七四數有從臣
清要捧天書烏臺青瑣遷藩臬之句何可逃也啟始
服其術因求範圍歌訣為之序而梓之以廣其傳云
豫章書

郭脩翰永豐人父益懋為諸生僑寓惠州興寧生脩翰
讀易讀史手不釋卷母盲廢自謂採給行傭吾不如
江次翁遂窮天文七政諸書賣卜於市得錢供母星
學名一時有人問壽曰子不及糲迨五月三日其人

怒反詰之曰吾糧及釜矣越明日疾作張督府岳以
司馬內召過程鄉召問之對曰猶寄長城三歲張愕
然尋有麻陽之命言王方伯當大用一歲兩遷但不
得專敕王曰方伯例必列銜中丞撫一重鎮何為無
敕果尹京兆再遷卿陸方伯杰深信之薦於邱大參
民範言其旬日必及禍邱怒欲罪之以出陸門下姑
遣人守之使不得逸去至期果蓋棺貳守莫同自惜
不及第恒俯首於人脩翰言一歲入召再歲按察提

刑若持左券然庚戌六月病羅俶問之脩翰曰而命
當先我死猶來問訊耶初三羅無病驟卒脩翰自知
死期云我六旬有六六月六日無生理果然

廣東通

志

趙銓字仲衡廬陵高唐里人精岐黃術制業仍不廢以
諸生貢於朝仕靈壽霍山兩邑夏貴溪大拜入京夜
泊吳城靜中忽傳呼聲雜以絲竹金革市驛交喧月
下隱隱有宣言藥王到者貴溪詢藥王何人曰姓趙

已而寂然乃銓舟至貴溪索見與語大加賞異即同
入京會世廟不豫太醫束手貴溪及大臣公卿咸舉
銓入診視不終劑而聖躬大安後解組歸惟著書脩
真而已有乞醫者即赴之不責人金帛而施藥不急
又善太素脉清江蕭須山病篤銓往適病者假寐先
診其長子取酒相賀曰子脉無憂何妨乎父壽授一
劑而愈出都門時見一死者已含斂方下棺銓下馬
啟其衣衾令取沸水下刀圭灌之而甦其神類如此

銓臨終無病腹中閣閣作聲笑曰龍吟虎嘯風雲慶
會吾當赴之有頃異香滿室見頂上一道光彩冉冉
而上而銓坐逝矣經日如生所著有春風堂集石亭
醫案岐黃奧旨諸家醫斷太素脉訣

廬陵縣志

陳宗文泰和人幼遇異人授以醫術凡診人脉或無病
而言死或易簣而言生或在童時而言終身貴賤壽
夭無不奇中嗜酒豪邁視利如土苴

安志

蕭公伯泰和人善畫照其染色處可占人榮枯不但肖

之而已時有畫師寓邑之普覺寺公伯慕其名往事之盡得其法一日汲水故遲至師責之公伯曰適見二鬼鬪因忘歸遂以水畫地作狀師大驚服遂有名

同上

郭詡號青狂泰和人善雜畫信手作人物輒有奇趣而詩尤過之其姪巖學之益精妙並入圖繪寶鑑

同上

撫州府

宋

陳撫臨川人周益公必大贈以正易心法易索兩書謂
心法出麻衣道者其傳則希夸先生可以求天理易
索太和張汝明所作可以知人事撫得之遂以精易

卜名

府志

徐熙字淡山金谿人善寫淡墨山水受知徽宗欲授以
官熙對曰臣願為布衣人也上即賜名布衣高士云

縣志

陳自明字良甫臨川人精於醫以李師聖郭稽中所著

產論室慶諸集綱領漫而無統節目畧而未備醫者不能深求徧覽乃採摭諸家附以家傳驗方編輯成書凡八門數十餘體總二百六十餘論論後列方為大全良方金壇王肯堂為證治準繩女科一部全用之

安志

元

普稱撫州僧也至元間人初唐一行禪師作星歷書十有三家誓曰國興則見未興則隱後青城山僧號枯

木傳此書於史彌遠家至普稱又得其傳而後四明
慧月號琴堂者挾斯文至大都明南昌僧號普庵復
獲此書於天界寺授括蒼季宗舒遂揚其波至今稱
琴堂五星云

星學大成

明

曾易明金谿人景泰中遇異僧授以堪輿家術為人卜
地衰旺興廢輒先定其年月日時皆奇中臨川饒氏
館易明於家者三年事之特謹然終不敢以地請最

後易明乃指示曰某可墳某可宅卒賴其力或以富貴傲即有重賄輒拂衣去不娶妻無子漸能辟穀不知所終

安志

李興生樂安人患風痺欲飲食則仆卧於地始能下咽欲言則畫地作字始達其意頗能詩董侍御未第時獻詩曰清時早展為霖手莫遣蒼生望八荒後董欲養於官辭以母老為作傳比之支離子興之流亞云

同上

張神峯臨川人精星學以五行祿命諸書治習訛舛著
闢謬一書海內星平皆宗之

同上

建昌府

國朝

李如璋字子孚南豐人幼通敏五官並用尤精九章數
學順治壬辰度田令下疆域新定田賦紛錯民緣為
姦邑中集老算手數十人月餘不能楚如璋年十五
哂其煩苦掣珠盤左右手撥動如飛聲若流水銖黍

無差數日一邑糧清江右通省錢穀勾稽校覈綱舉目張皆其手定至今便之謁選得嘉定江灣司巡檢能其職以不肯俯仰上官投劾歸

懷葛堂集

廣信府

宋

俞直玉山人通素問玉冊之書內外常變之辨至河洛易象太元之數三統九經五行納音之旨無不求其義而為說秦檜為相時欲館置直謝不肯就紹興辛

已金人犯淮用事者遣使問以兵退之期言皆切中
惜後世無有傳其書者

玉山縣志

鄭同字亦虛玉山人以行義見推於鄉尤精書法舉八
行科而不果上米元章與同帖云晝寢夢龍蛇遶榻
及覺乃小兒披來翰也其稱之如此

安志

葉子仁上饒人推算筮占往往如破的歲乙酉真文忠
方在班子仁以書勸補外甚力未幾果去國子仁每
推論五行輒以善道勉人如孝弟忠信清心寡欲等

語未嘗不懇切言之真文忠贈以絕句云易象推占
妙入神勸人忠孝更諄諄只今誰似君平術惟有南
陽賣卜人

信乘續對

元

方壺子姓方氏名無隅龍虎山人學仙於金蓬頭結社
於張孟循盧伯良其畫冠絕一時尤精於竹張宇初
稱為壺仙嘗於高石徐氏畫青山白雲圖學士虞集

題句

董史會

張與材字甲梁號薇山別號廣微子善畫竹與龍張嗣
成號太元能畫龍亦畫有廬山圖張嗣德號太乙善
寫墨竹禽鳥吳霞居龍虎山善畫龍

同上

明

林森上饒人家世業醫資性靈朗博究羣書郡舉任醫
學正科活人之功不可勝紀

安志

周詔字天章上饒人為人俊雅出塵輕財好義嘗於江
湖中遇異人授以地理指掌圖盡得山川源委脉絡

之詳以是邃於地理蔡虛齋稱其談論符經義脫世
味有近道之資欲論薦之未果因為序以見意

同上

張祉字天與鉛山人幼習舉子業因繼母疾不愈遂棄
所業徧訪名醫傳鍼灸之法為人尚義人病多賴以
生更不責報善書能詩所著有釣石集

府志

程福生字梅巖玉山人精書法燕京承天門關王廟石
碑其真跡也八分書尤工畫梅清瘦絕倫有金石遺

文四本

安志

洪濤弋陽人少業儒後專醫每施藥濟人如神授太醫院副從征交趾軍中大疫濤以蒼朮黃柏百鍋煮之徧飲皆愈改榮藩良醫正王缺濤搗藥補之如天成賜建國醫坊號為補唇先生年九十致仕

同上

王適字太古玉山人初充府掾棄去究詩書尤工畫十許年聲名藉藉人以畫強索不肯襲應遇知己酒酣興到下筆淋漓殊足珍玩所著太古集二卷傳世云

同上

邱可封字汝禮貴溪人由歲貢歷官國子典簿博覽羣書通天文尤精素問與人切太素脉談休咎終身不爽所著有醫書及經驗奇方多出自創

府志

饒州府

唐

柳翁天祐中人常乘小舟釣鄱陽江中凡水族之類與山川深遠者無不周知鄱陽漁者咸咨訪而行呂師造為刺史脩城掘濠至城北則雨止役則晴或問柳

翁翁曰此下龍穴也震動其上則龍不安而出穴龍
出則雨掘之不已則霖雨方將為患既深數丈果得
方木長數尺交構疊之累積數十重其下霧氣衝人
不可入而止木皆腥涎縈之刻削平正非人力所為
自是果霖雨為患呂氏諸子將網魚鄱江召問翁翁
曰南岸一處今日有魚然有一小龍在焉諸子不信
網之果大獲舟中以巨盆貯之有一鯉長一二尺雙
目精明有二長鬚遶盆行羣魚皆從將之北岸遂失

所在杳竟不知所終

稽神錄

郭常饒州人業醫饒江其南道自閩頗通商海外波斯
安息之貨國人有轉估於饒者病且亟他醫莫能治
請常為診曰病可去也估曰誠能生我當酬錢五十
萬常因舍之先以鍼火雜治導其血關然後輔以奇
藥月餘而愈欲歸常所許財不受估曰先生以為寡
歟常曰吾直吾之藥計吾之功不能損千文而所受
非任反禍耳人以常為詐而責常常曰夫販賣之人

計量於毫銖之間今奪其五十萬則必追悵鬱惋寧
能離其心且藥加於人病新去而六腑方億復有悵
然之氣自內而伐即不可救奈何彼方有疾時知我
能治而告我我幸免之因利其財又使其死是獨不
畏為不仁而神可欺者吾何敢欺

沈亞之集

宋

吳景鸞字仲翔德興人漢長沙王芮裔孫祖法旺喜天
文地理之學聞華山陳搏洞徹祕奧遣子克誠往師

之得其肯綮一日搏命之歸曰汝子仙才能紹業盡
以青囊書授克誠誠子即景鸞也聰慧過人得其書
精究有驗慶歷辛巳詔選精陰陽者郡縣舉景鸞至
京入對稱旨授司天監正未幾因論牛頭山山陵章
奏過直有坤風側射厄當國母離宮坎水直流禍應
至尊下殿之語上不悅下獄尋以帝昺駕遇赦又進
中餘圖不報知事不可遂佯狂髡髮脩真於天門西
岸白雲山洞往來饒信二州數處同日皆有景鸞跡

治平初一日忽以遺書付其女沐浴更衣端坐而逝
所著有理氣心印吳公解義

安志

傅伯通德興人與鄒仲容同師廖金精金精得之吳景
鸞宋南遷伯通拜詔往相臨安表畧曰顧此三吳之
會實為百粵之衝錢氏以之開數世之基郭璞占之
有興王之運天目雙峯屹立乎斗牛之上海門一點
橫當乎翼軫之間雖云自昔稱雄實乃形局兩弱只
宜為一方之巨鎮不可作百禩之京畿駐蹕僅足偏

安建都難奄九有表上竟陞杭州為臨安府而稱行

在

同上

鄒寬字仲容師廖金精得其術為汪伯彥卜地塋親乃
借堪輿家論貽書以動之末云方今幽燕未歸版籍
朝廷有意恢復倘值此時揚師整旅當勿計名位高
卑昌言於朝奮力請進必立希世功名若叅之他見
微有更改妄觸一機百關俱廢汪是其言而不能用
丁未拜相鄒術果奇而書中之議竟托空言

同上

王克明字彥昭饒州樂平人徙烏程初生時母乏乳餌以粥遂得脾胃疾長益甚醫以為不可治克明自讀難經素問以求其法乃愈始以術行江淮入蘇湖鍼灸尤精診脉有難療者必沈思得其要然後與之藥病雖數症或用一藥以除其本本除而餘病自去亦有不預藥期以某日自安有以為非藥之過過在某事當隨其事治之言無不驗魏安行妻風痿十年不起克明施鍼而步履如初胡秉彛妻病氣祕腹脹呼

號踰旬克明以半硫圓碾生薑調乳香下之俄起對
食如常廬州守王安道風喋不語旬日克明令熾炭
燒地灑藥置安道於上須臾而蘇金使黑鹿谷過姑
蘇病傷寒垂死克明治之明日愈及從徐度聘金谷
適為先排使待克明厚甚訝之谷乃道其故後再從
呂正已使金金接伴使忽被危疾克明並起之却其
謝張子蓋救海州戰士大疫克明在軍中全活者幾
萬人張欲上其功力辭之克明頗知書好俠尚義嘗

數千里赴人之急初試禮部中選累任醫官王炎宣撫四川辟克明不就炎怒劾克明避事坐貶後遷至內翰林醫痊局賜金紫紹興五年卒年六十七

宋史

楊賁亨鄱陽人博羣書精脉理每心計造方有患飢者諸醫以火症治賁亨久思之未得頃見堂上木橙自仆乃為濕氣所蒸致朽忽悟水能消物不獨屬火此濕消爾投熱劑而愈又有顯者瘴目性躁日憂切益不瘳賁亨給曰目可計日即痊第懼毒發於股又日

撫其股憂之後目忽瘳而股亦無恙蓋誘其心火下

降爾術遂大名於時

同上

富春子善推占嘉熙丙申客饒語人曰此州將出宰相
然未見其人也他日自饒還池州又曰何為宰相聲
復在此方驚咤不自決值國忌提舉段霞午而下羣
集報恩寺富春子往候馬一見池教馬廷鸞驚曰此

其人矣後果驗

同上

元

蔡槐號月湖德興人僑居建康少讀書卓犖不羈好相
人不妄許可至元二十三年與學士傅立等偕召詔
問朕壽幾何對曰仁者壽陛下壽及八旬時春宮未
建嘗賜見便殿俾定儲君於諸王孫中對曰某太孫
龍鳳之姿天日之表他日必為太平天子後七年登
極即成宗也久之大臣有為姦利者請問休咎槐拒
不往他日見於朝辭色甚怒槐曰相公能憂國愛民
自可享期頤之福何問為然亦懼其讒授集賢學士

辭不拜乞歸田里從之已時相果敗元貞改元復召

不赴

豫章書

梁饒德興人元季時精堪輿術一日過樂平大汾潭遇雪時歲暮渡者李翁止宿飲至酣大呼曰世上何人能識我今日時師後代仙李懇求吉地梁即指示穴處囑曰貴從武功來禍後福始應塋數年李以罪戍定遠產黔寧王英明祖育之軍中賜國姓復賜姓沐追封三代皆為王

安志

操貴持字子敬浮梁人也官教授卜筮多奇中

同上

李時茂字誠仙居至道宮有閉縱陰陽之術善役使鬼神風雪雷雨祈禱立至鄉人稱為李神仙

府志

張愷都陽人良醫季民孫善療奇疾有女子阿欠兩臂直上不能下諸藥莫治愷令其母解女子裙襦坐寢室乃揚言醫入女忽擲手下掩體舉動遂如故又一小兒坐高處懸跌於地瞳人倒視見房屋皆翻覆愷令有力者將小兒顛倒數次其視即順凡藥石難療

之疾愴不執方脉以意治之無不立愈

同上

明

楊文德樂平萬全鄉人攻醫精內經太素脉明初徵入
太醫院洪武戊寅乞歸田里上書種德二字賜之舟
抵饒城醫者劉宗玉延之文德為講岐黃心法以太
素授之紫極宮朱道士疾文德診之不數劑而愈朱
以銀飲器謝之却再三方受中途長嘯時宗玉子烈
問其嘯之故文德曰徒受其惠明年春肝木旺脾土

受剋至期果死黃復昌疾文德診之曰一劑即瘥官
貴脉旺秋當入仕尋以當路薦授丹陽令所著有太

素脉訣一卷

安志

董德彰名潛事孀母至孝一日救白神龜夢示仙書於
石巖中得之遂精堪輿不計利不能葬者助之或一
塋未善復為之遷時稱董半仙著有四神祕訣水法
等書同邑程天昭十九都人著有道法雙談撼龍疑
龍二經註解傳於世

德興縣志

張宗烜字明遠一都人精岐黃術著方書數千卷

同上

高道者得長桑君禁方當明初挾技遊銀陽一日值柩於途謔之乃孕婦喪也道者驗其遺衣血曰此猶未死啟其棺一鍼而甦今傳其小兒方術無不驗者云

安志

江濟字汝楫本姓鄭天順己卯舉雲南鄉試歷官同知

善山水載畫譜

浮梁縣志

程世光鄱陽人擅小兒科憲王誕長子初出胎不知吮

乳曰難產傷氣持人參煎湯灌半匙即吮又舟工生子胞而無皮取土數升糝其體即成肌有胎婦兒腹啼皆不治乃傾豆於地令婦低首拾之兒啼止其醫多一意出弗拘方書神効如此

府志

孫卓三浮梁人精岐黃之學正德間邑令以宸濠之變先輿送其夫人避山中病前祕五日腹脹如鼓仰而張目息已徵急召卓三曰此盛暑急驅飲水過度羞溺而胞轉也法以猪尿胞吹氣貫滿令婢女投入衝

之而溺淋淋下遂起新安富室有男子淋溺不止者
漸痿黃諸醫束手卓三醫之亦弗効偶隱几坐以手
戲弄水灌後孔塞則前竅止開則通為腦後一穴灸
火三壯立愈

安志

項世賢樂平人名嗣宗以字行幼警悟師事德興彭宗
伯洞明岐黃內經之說遇異人授以子午八法用鍼
之旨不資丸散沈疴宿疾應鍼而起人以為神邑有
舁舊牀過其門者世賢止之於朶枕中鍼出一療蟲

殺之又至廣信有患遽除不伸者賢鍼之獲平施惠

於人至老不衰

府志

蔡天奇浮梁諸生從素問本草精以深思亦不屑屑赴人之召人有危疾問天奇天奇輒問他醫診狀或取其方增減一二而奇中嘗示諸醫曰人有重病則我亦病病窮日夜之思僅可得起一人汝輩慎之

安志

吳從善鄱陽人本道士善相法郡縣甯某與弟貌相肖初令假衣冠坐廨中試之從善揖而不拜曰此非四

品骨衆皆失笑見稅課呂銘曰官當至二千石後果擢刑部郎出知西安府見都主簿孫誕曰公本鸞鳳豈終枳棘之棲後官遷至山西按察僉事言無不驗人呼為鸞道士

府志

西渚子鄱陽人或謂其本學孝廉以卜隱遇物起數甚驗有姓某儀賓持象牙笏問之曰簪笏之貴却緣骨月後僂人亦以簪笏往曰雖近簪笏奈體輕微居鄱久著名尋遊四方各變名號以顯其術

安志

洪魁八樂平人世業岐黃幼得異授精於太素脉八法
神鍼邑人黎澄葉瑞當未遇時以疾延其診視輒預
定其科第與歷任地方卒之時日斷休咎死生百不
失一年八十餘無疾而坐化

同上

徐善繼德興人補邑庠生以親喪未厝與弟善述究心
堪輿之學因得吳景鸞遺書於天門白雲洞遂深明
其奧旨遷縣治易學基士大夫莫不欽其慧識所著
有人子須知徐文貞階序其書

同上

南康府

晉

幸靈建昌人性少言與小人羣居見侵辱而無愠色邑里號之癡雖其父母兄弟亦以為癡也嘗使守稻羣牛食之靈見而不驅待牛去乃往理其殘亂者父母見而怒之靈曰萬物生天地之間各欲得食牛方食奈何驅之其父愈怒曰即如汝言復用理壞者何為靈曰此稻又欲得終性牛自犯之靈可以不收乎時

樊長賓作官船於建城山令人各作箸一雙靈作而未輸或竊之而心痛靈曰得無竊我箸乎竊者不應頃愈急靈曰不以情告我真死矣竊者乃出之靈飲之以水病即愈船當下吏以二百人引一艘不能動靈請自牽之惟用百人而船去如流龔仲孺女病積年靈以水含之而愈呂猗母皇氏得痿痺病十餘年靈療之去皇氏數尺而坐冥目寂然有頃顧猗曰扶夫人起猗曰老人得病多年何可倉卒起耶靈曰但

試扶起俄又令去扶即能自行遂愈高惺家有鬼怪
言語訶叱投擲內室不見人形或器物自行再三發
火乃邀靈靈惟據軒小坐而去其夕鬼怪即絕靈所
救愈多類此然不取報謝行不騎乘長不娶妻性至
恭見人即先拜言輒自名

晉書藝術傳

元

劉開字立之習釋老學嘗遊廬山遇異人授以太素脉
行世元帝召赴闕賜號復真先生卒葬於西古山安

志

明

鄧霆祐號元元真人釣臺鄉人同袁霆奎祕授符咒異術於李元洲凡禱雨祝晴降魔逐疫無不應也俗傳其白晝驅雷神現形拔庭西大樹植之東邊子又元孫重元世傳其術云

建昌縣志

九江府

唐

白岑曾遇異人傳發背方其驗十全後為淮南小將節
度高道曾取其方然不甚驗岑至九江為虎所食驛
吏於囊中乃得真本太原王昇之寫以傳布

國史補

宋

法堅廬山僧以醫名宋太祖召見賜紫方袍號廣濟大
師景德二年雍王元份久被疾召赴闕至則元份已
薨還山卒時沙門法蘊亦以善醫工診切每先歲時
言人生死多中賜紫方袍號廣利大師一時稱樂王

藥上再現云

安志

李仲寧九江碑工黃山谷題其居曰琢玉坊崇寧中刊
元祐黨籍姓名太守使劉之李曰小人家故貧窶因
刻蘇內翰黃學士詞翰至飽暖名為奸人誠不忍下
手守義之曰賢哉士大夫所不及也餽以酒從其請
王氏揮塵錄

明

王九達字曰達德安人性疎放坐事被逮逃之吳越間

遂家焉刻苦攻醫自悟心法凡遇奇病治輒應手斷
除某病某經某勝某尅某逆某邪某標某本某生某
死某病某日已若候潮汐一一不爽崇禎間典職太
醫錢相國龍錫述其事甚詳所著有素問靈樞合類
九卷又心傳九種皆刻成書何郎中萬化吳尚寶爾
成韓侍讀敬序之晚念故里歸卒於家

安志

宋光紳號橫秋業儒不遇先世曰杏莊者善小兒痘症
遊四方遇異人授以祕書醫由是顯其書具在光紳

習馬復擅長一時人延之風雨弗避未嘗計利也一日暮歸道拾遺金啟視之則某甲輸糧者晨起詣故處望其人踉蹌來告曰我拾得以俟君其人願分半為壽光紳笑而遣之

彭澤縣志

花自達號喬石德化文學也父質字患痔手調飲食侍寢處六年即留心於醫所著有尊經上下二傳時王九達有素問靈樞合類之編慮其割裂顛倒尊經之旨亦孟氏不得已之心嘗著論外感如陰陽升降之

候轉變順逆之機經絡上下之屬論內傷標本從違之數虛實補瀉之功寒熱溫涼之理無不井分條貫問里爭誦之當道召之不赴貧苦無告者不召輒往治之藥餌之外且以廩肉餽順治初蕭國柱舉以自代周太守璜敦請之不就將卒附身之具一未備勉留數日問曰事畢否知草率畧具起索筆硯咸謂當有遺言乃伸紙疾書曰生平無所得惟此兩玉壺一朝帶不去撒手隨太虛擲筆而逝

府志

南安府

唐

楊元亮襄州人久視中年二十餘於虔州汶山觀傭力
晝夢見天尊云我堂舍破壞汝為我脩造遣汝能醫
一切病寤而說之試療無不愈者贛縣里正背有腫
大如拳亮以刀割之數日平復療病日獲十千造天
尊堂成遂無効

朝野僉載

宋

謝昔臣虔州術士蘇軾過虔贈詩云屬國新從海外歸
君平且莫下簾帷前生恐是盧行者後學還呼韓退
之死後人傳戒定慧生時宿直斗牛箕憑君為箕行
年看便數生時到死時

東坡集

贛州府

唐

楊筠松贛州人僖宗朝掌靈臺地理事官至金紫光祿
大夫黃巢破京城乃斷髮入崑崙山步龍後至虔州

以地理術授曾文述劉江東世稱救貧仙人是也卒

於虔堊雩都藥口壩

府志

僕都監逸其名善青鳥術與楊筠松俱官司天監都監
因黃巢之變避地寧都縣懷德鄉以其術傳中壩廖

三傳

豫章書

宋源曰堊書始於郭景純唐末楊筠松與僕都監
竊祕書中禁術自長安至寧都遂定居焉後以其
術傳廖三傳廖傳其子瑀瑀傳其壻謝世南世南

傳其子永錫遂祕而不授世之言地形者其盛無
踰此數人今其書世多行之皆與郭氏合世不信
地理之術則已信之舍此將何從求之歟元新喻
劉則章有壘書註釋金華鄭彥遠復校而刻之

曾文述雋都崇賢里人師事楊筠松凡天文讖緯黃庭
內景之書靡不根究尤精地理梁貞明間至袁州萬
載愛西山之勝謂其徒曰死塋我於此卒如其言後
其徒忽見於豫章歸啟其官無有也所著有八分歌

二卷

豫章書

宋

劉江東雱人楊筠松在虔州江東因同曾文述傳其術
初楊與曾並不著文字江東稍有口訣其裔孫謙為
宋吏部郎中知袁州事乃著囊經七篇詞旨明暢人
傳誦之

字伯玉寧都人年十五通五經人稱廖五經建炎
以茂異薦不第後精父三傳堪輿之術卜居金精

山自稱金精山人所著有懷玉經

同上

卜則巍字應天贛縣人精形家言著作甚富所傳雪心

一賦旨約而該業地理者咸宗之

同上

元

彭雷巖贛縣玉虛觀道士以祈禳方技顯於元盛時頃刻間能致風雨人有疾病立能愈之其魑魅為怪者

禁使絕跡解學士縉謂其得劉繼先遺術云

同上

明

蕭九賢字慕白會昌人精內外諸科洪武中充里長解
實竹入都時馬后病乳癰甚危太醫罔效乃揭榜召
醫九賢應召診視投劑三日而愈授太醫院吏目馳
驛歸里著有外科啟鑰回生要義諸篇

會昌蕭氏族

譜

廖均卿瑀之裔成祖卜壽陵久不得吉壤永樂七年仁
孝皇后未葬禮部尚書趙瑄引均卿至昌平得縣東
黃土山最吉車駕即日臨視定議封為天壽山命武

義伯王通等董役授均卿官

安志

邱弘道雱都人博學能文得郭璞塋經究心三十年遂精其術淺深去就皆有法與人言必以忠孝為本云

劉槎翁集

劉漳贛縣人吏滿考授樂昌高勝巡檢宣廟時以寫真得幸改鴻臚寺序班入內供奉尋陞錦衣衛鎮撫副

千戶

安志

王純贛縣人工水墨畫所作人物樹石意趣天然而筆

法亦蒼古人稱為石林畫史

同上

袁肯字仰夏雩都人棄儒明醫瀕死者輒能起之鄉人
召請即地險僻天大寒暑應之無倦色又能呼風霆
役鬼物歲旱為民禱雨輒應邑東五里靈泉巖古渡
下有巨潭怪物作祟歲溺者無算肯書符焚潭中旬
日雷雨晦冥山頂石隕於潭其患遂息子淳以進士


官御史

同上

國朝

羅牧字飯牛寧都人工書畫得魏石牀之法而益精寓
居南昌巡撫宋犖作二牧說贈之得冠石林峭齋芥
茶法亦善製茶巡撫郎廷極為詩紀其事牧亦能詩
年八十餘海內爭購其筆墨真蹟或不可得

府志



江西通志卷一百六

欽定四庫全書

史部

江西通志卷一百七

詳校官監察御史_臣范衷

檢討_臣德生覆勘

總校官知縣_臣楊懋珩

校對官中書_臣石鴻緒

謄錄監生_臣史廷爽

欽定四庫全書

江西通志卷一百七

祥異

箕陳禹範休咎並徵雨暘寒燠曰時與恒劉班繼之
用志五行貌言視聽類應為憑用占物候用協人情
聖皇御宇海晏河清諸福備至嘉祥並呈箕風畢雨實
廛民生江西樂土時慶豐亨人康物阜長頌昇平作
祥異志

七政歷分星諸占曰躔星紀之次其分野方位吉日蝕
在斗春秋感精符曰國飢武氏曰吳地有兵月蝕在
斗占曰國飢又曰兵起月入南斗荊州占曰吳越有
災期不出三年月犯南斗陳卓曰風雨不時兵起月
乘宿南斗占曰有風雨歲星在南斗占曰吳越有福
歲星守南斗石氏曰歲星守中久則穀貴春秋合誠
圖曰歲飢人相食歲星熒惑合於南斗占曰吳越飢
旱不可用兵鎮星守南斗福德在吳歲鎮斗牛吳越

之福鎮星犯南斗占曰先水後旱太白犯南斗主寇
兵太白守南斗黃帝占曰所守之國凶太白鎮星合
於南斗占曰吳越有兵太白合歲星在斗占曰為亂
飢為內兵太白晝見南斗占曰有兵喪辰星犯南斗
天文錄曰有水災辰星守南斗陳卓曰萬物不成五
穀傷敗熒惑犯南斗其地主兵變熒惑守南斗占為
亂賊喪兵守之久其國絕祀客星守南斗占曰有兵
絕道大水盜賊起黃帝占曰五穀先賤後貴客星出

南斗石氏曰天下飢人相食關梁不通客星在南斗
占有兵有赦流星入南斗占曰穀貴民勞彗孛犯南
斗占曰吳越兵起有自立者三年而滅又曰吳越大

水

郭子章
豫章書

春秋

魯昭公三十二年

敬王
十年

夏吳伐越始用師於越也史墨

曰不及四十年越其有吳乎越得歲而吳伐之必受

其害

左傳

按杜注云此年歲在星紀吳越之分也歲星所在
其國有福吳先用兵故反受其殃杜注本之服虔
而鄭注則云天文分野斗主吳牽牛主越此是歲
星在牽牛故吳伐之凶鄭注本之劉向其義較長
孔氏正義譏鄭為妄者非也

越之亡熒惑守斗

史記天官書

漢

文帝五年吳暴風雨壞城及官府民舍

豫章書

十二年有

馬生角於吳角在耳前上鄉向右角長有三寸左角長二寸皆大二寸劉向以為馬不當生角猶吳不當舉兵上向也時吳王濞封有四郡五十餘城內懷驕恣天戒數見終不改悟後卒誅滅

豫章書

漢孝景帝二年七月丙子火與水晨出東方因守斗占曰其國絕祀至十二月水火合於斗占曰為涿不可舉事用兵必受其殃斗吳也又為粵是歲彗星出西南其三年吳楚膠西膠東淄川濟南趙七國反吳楚

兵先至攻梁漢遣大將軍周亞夫等戍止河南呂侯

吳楚之敝遂敗之吳王亡走粵粵攻而殺之

漢書天文志

建平中豫章有男子化為女子嫁為人婦生一子

豫章書

建武二十四年九江多虎大蝗

林志

永平九年十月底中客星出牽牛長八尺歷建星至房

南滅見至五十日牽牛主吳越後廣陵王荆與沈涼

楚王英與顏忠各謀逆事覺皆自殺十八年十一月

甲辰晦日有蝕之在斗二十一度是時馬太后制爵

祿故陽不勝

後漢書
天文志

永平十三年白鹿見南昌

林志

永平末豫章蝗穀不收民

饑死每縣幾數千百十人

五行
志注

元和二年白鳥見南昌時李儀為太守

林志

三年海昏縣

出明月珠

縣東十五里
地名珠溪

大如雞子圓四寸八分

古今
注

永元十一年豫章餘干得白鹿高丈九尺

古今
注

永初六年夏六月豫章負谿原山崩共六十三所

鄭樵
通志

元初六年南昌芝草生

通鑑
綱目

永建六年十二月壬申客星芒氣長二尺餘西南指色
蒼白在牽牛六度客星芒氣白為兵牽牛為吳越後
一年揚州六郡逆賊章何等稱將軍犯四十九縣大
劫略吏民

後漢書
五行志

永和二年八月庚子熒惑犯南斗斗為吳明年五月吳
郡太守行承事羊珍反江賊蔡伯流等數百人攻廣
陵九江燒城郭殺都長四年七月壬午熒惑入南斗
犯第三星斗為貴相為揚州熒惑犯入之為兵喪其

六年大將軍王商薨九江丹陽賊周生馬勉等起兵

攻沒郡縣

同上

永和間豫章太守孔竺臨郡三月白雀出南昌

藝文類聚

吳

黃武元年鄱陽白龍見三年鄱陽大飢七年豫章黃龍

見

安志

赤烏十一年夏五月鄱陽言白虎仁

豫章書

十三年夏五

月日北至熒惑逆行入南斗秋七月犯魁第三星太

元二年權薨是其應也故國志書於吳

晉書天文志

魏高貴鄉公正元元年十一月白氣出南斗側廣數丈
長竟天王肅曰蚩尤之旗也東南其有亂乎二年正
月有彗星見於吳楚分西北竟天鎮東大將軍毋丘
儉等據淮南叛景帝討平之是歲吳主孫亮五鳳元
年也斗牛吳越分案占吳有兵喪除舊布新之象太
平三年孫綝盛兵圍宮廢亮為會稽王故國志又書

於吳

同上

太平初嘉禾生南城

豫章書

永安六年赤雀見豫章

豫章書

晉

晉武帝太康元年正月己丑朔五色氣冠日自卯至酉

占曰君道失明丑為斗牛主吳越是時孫皓淫暴四

月降

同上

是年豫章生嘉禾龍見於建昌七里汀立祠

祀之後禱雨輒應

安志

三年白雀見豫章

玉海

五年秋七

月嘉禾生南昌

豫章書

秋九月南安大霖雨暴雪樹木

摧折害秋稼

鄭樵通志

七年木連理生豫章太守蘭隸以

聞

安志

八年夏四月木連理生廬陵東昌

白下大記

元康四年秋七月白鳥見鄱陽

豫章書

永興元年彩雲覆豫章甘露降麒麟見是年石陽地震

水湧山崩

安志

九月太白入南斗是年陳敏亂揚土

晉書

志

二年蝗大飢

安志

永嘉三年鎮星久守南斗占曰鎮星所居者其國有福

是時安東琅邪王始有揚土

同上

六年秋七月豫章郡

有樟樹久枯忽更榮茂元帝中興之應也永嘉末豫章有大蛇長十餘丈斷道過者蛇輒吸之吞噬百人吳猛與弟子殺蛇猛曰此是蜀精蛇死而蜀賊當平既而杜弼滅

豫章書

元帝渡江歲鎮辰太白四星聚於牛女間

晉中興書

太興元年正月麒麟見豫章

豫章書

冬十二月廬陵豫章

地震湧水出

鄭樵通志

二年夏五月蝗

豫章書

三年春正月

白鹿二見豫章

孫氏瑞應圖云白虎

太寧三年十一月癸巳朔日有蝕之在卯至斗斗吳分

也其後蘇峻作亂

晉書志

咸和二年春二月南昌有騶虞見

安志

夏四月己未豫章

地震

鄭樵通志

四年冬十月柴桑廬山西北崖崩

豫章書

咸和四年七月有星孛於西北犯斗二十三日滅占曰

為兵亂十二月郭默殺江州刺史劉胤荊州刺史陶

侃討默斬之

晉書志

咸康二年秋七月白鹿見望蔡豫章太守桓景獲以獻

五年南昌民掘地得銅鐘四枚太守褚裒以獻

豫章書

永和十二年秋七月甲申白兔見鄱陽太守王者之以

獻并上頌一篇

豫章書

升平四年春二月鳳皇將九雛見於豐城

安志

興寧三年夏五月廬陵西昌修明家有僵粟忽復起

晉書

咸安二年春三月白虎見豫章南昌縣西鄉石馬山前

豫章書

太元六年夏六月江州大水

豫章書

十一年秋八月乙酉

白鳥集江州寺庭羣鳥翔衛

豫章書

十四年桐木連理

生豫章新淦陸地生蓮太守范甯表聞

藝文類聚

冬十一

月辛亥白虎見豫章

豫章書

十六年太守范甯獻白鹿

一頭

晉起居注

十八年夏六月己亥南康廬陵大水深五

丈

鄭樵通志

十九年十二月癸丑太白犯歲星在斗占曰

為亂飢為內兵斗吳越分至隆安元年王恭等舉兵

二年恭及桓元陷江州是後連歲水旱飢

晉書志

隆安四年正月乙亥月犯填星在牽牛占曰吳越有兵

喪女主憂

同上

元興二年十一月辛巳月犯熒惑十二月桓玄篡位遷

帝后於潯陽三年二月劉裕盡誅桓氏

同上

三年江州

竹生實如麥夏六月白雀見新淦獲以獻

豫章書

義熙元年八月丁巳月犯斗第一星占曰天下有兵一

曰大臣憂案江左來南斗有災則吳越會稽丹陽豫

章廬江各隨其星應之

宋書天文志

南康雩都山有金雞

青黃色飛集巖間

豫章書

五年春正月戊戌夜潯陽地

震有聲如雷六年三月己巳月掩斗第五星占斗主

吳兵起是年徐道覆廬循反

宋書天文志

七年白雉見南

昌

安志

八年自正月至四月南康廬陵地四震

鄭樵通志

義

熙中豫章郡吏易拔變為三足虎

吳苑

宋

文帝初為宜都王臨川人獻王萍實六子大者如斗小者如鶴卵圓而赤初莫有識者以問長史王華曰此萍實也宣尼所謂王者之應宋祚當卜年六百頃之

宜都王即位

渚宮故事

六年春三月白象見安成安復江

州刺史南譙王義宣以聞十七年潯陽祐成湖芙蓉

生連理二十年夏五月廬陵郡地芙蓉二花一蒂太

守王淵以聞二十一年白雀見南昌二十二年春二

月辛未白鹿見贛縣南康相劉興祖以獻豫章豫寧

得銅鐘江州刺史廬陵王紹以獻二十四年春二月

壬午臨川王第梨樹連理臨川王燿以聞三月甲寅

甘露降潯陽廬陵王紹以聞夏四月癸未甘露再降

潯陽丙申又降江州城內桐樹丁酉又降城北數里
廬陵王紹以聞二十七年夏四月乙卯至戊午甘露
頻降南昌戊午早時天氣清明有彩雲映覆郡邑甘
露自雲中降太守劉思孝以聞二十八年春正月戊
子木連理生潯陽柴桑又生州城內江州刺史建平
王宏以聞秋七月癸卯潯陽柴桑菽粟旅生彌漫原
野建平王宏以聞二十九年秋八月癸酉白鹿見鄱
陽南中郎將武陵王煒以獻

豫章書

孝建二年餘干地震死者二十九人

安志

三年春三月庚

子白鹿見臨川西豐夏四月丁亥臨川宜黃縣民於

田中得銅鐘七口內史傅徽以獻

豫章書

大明元年夏四月戊申白雀見潯陽冬十月丁丑木連

理生南昌五年夏五月白雀二見潯陽江州刺史桂

陽王休範以獻七年春三月丙申甘露降潯陽太守

劉濛以聞夏四月乙未白雀集廬陵王第廬陵王敬

先以獻

豫章書

宋孝武大明六年八月月入南斗魁中占曰吳越有憂
明年揚南大旱田穀不收民流死亡七年二月月犯
南斗第四星入魁中占曰豫章受災豫章王子尚死

宋書天

文志

泰始二年嘉蓮一雙駢花並實合柎同莖生豫章醴湖

王

海四年春二月丙申望蔡獲古銅鐘高一尺七寸圍

二尺八寸太守張辯以獻五年夏五月壬戌南昌獲

古銅鼎

安志云上有篆文

容斛七斗江州刺史王景文以獻

六年秋七月壬午白雀二見廬陵吉陽內史江孜以
聞冬十二月壬辰木連理生南昌太守劉愔以聞

豫章

書

元徽五年夏四月乙巳白雀二見潯陽柴桑江州刺史

邵陵王友以獻

豫章書

齊

建元元年夏廬陵長溪水衝擊山麓崩四年春三月白

虎見虔化縣

安志

永明元年夏五月木連理生安成新喻縣二年彭澤獲
白雉一頭三年春正月安成縣榆樹二株連理秋七
月安成王勗第獲白雀一頭四年夏四月東昌縣山
自比歲以來恒發異響二十五日有一巖禡落縣民
方元泰往視於巖下得古鐘一枚齊書五年望蔡獲白
鹿一頭春三月豫寧縣長岡山得神鐘一枚八年餘
干縣獲白獐一頭冬十二月柴桑縣陶委天家樹連
理十年鄱陽郡獻一角獸龍首鹿形龍鸞共色豫章書

梁

梁武帝天監元年八月壬寅熒惑守南斗占曰糴貴五穀不成大旱多火災吳越有憂宰相死是歲大旱米

斗五千人多餓死其二年五月尚書范雲卒

隋書天文志

二年夏六月太末信安安豐大水五年廬陵太守王希昉於高昌縣之仁山獲銅瑞劍二口以聞六年夏

六月新吳縣獲四目龜一

豫章書

九年望蔡縣得銅鐘

內史表箋以獻

安志

十年夏五月癸酉安豐縣獲一角

元龜

豫章書

大同五年十月辛丑彗出南斗長一尺餘東南指漸長
一丈餘十一月乙卯至婁滅占曰天下有謀王者其
八年正月安成民劉敬躬挾左道以反黨與數萬

隋書

天文志

太清三年夏六月江州大飢人相食

豫章書

大寶二年夏六月陳霸先發南康贛江水暴起數尺灘
石盡沒進軍頓西昌有龍見水濱高五丈有五采色

觀者數萬人霸先獨坐胡床於閣下忽有神光滿閣
燭照廊廡趙知禮怪問不答尋進軍討侯景破之

淳熙

志

陳

陳文帝天嘉四年九月癸未太白入南斗其後安成王
為太傅廢少帝而自立改官受爵之應也

隋書天文志

五

年春正月乙酉江州溢成火死者二百餘人

安志

太建七年冬十二月甲子南康郡獻瑞鐘一十四年秋

七月辛未江水色赤如血

豫章書

隋

開皇三年餘干大水漂市民三十五家

安志

八年十月甲

子有星孛於牽牛牛吳越之星陳之分野後年陳氏

滅

隋書天文志

唐

武德六年慶雲見洪州

安志

九年江州都督太子衛副率

侯君集於納義門獻白雀一

豫章書

貞觀十五年洪州獻元珪

玉海

十九年餘于鶴生三雛一

赤翎二白翎時縣令顧錫

豫章書

貞觀間洪州馬孝恭

入南山化為虎二十年後轉為人而死

安志

永徽元年夏六月饒州大水溺死者數百人

豫章書

顯慶元年秋七月吉州火焚倉廩甲仗及民居二百餘

家冬十一月己巳饒州火

豫章書

四年建昌白鳥集

安志

龍朔二年南康景雲見

安志

麟德六年望蔡縣來白麋入民家馴擾不驚郡守獲之

以獻二十七年春筠州大水

安志

垂拱三年飢天授元年白鹿見餘干習善鄉萬歲登豐

元年春三月壬寅撫州火

豫章書

開元五年洪州火延燒州署州人見有物赤而噉噉飛

來旋即火發

林志

十三年撫州三脊茅生

豫章書

十八年

白鹿見豫章二十七年春三月袁江二州水

豫章書

天寶初臨川郡人李嘉胤屋柱生芝草狀如天尊像太

守張景佚截獻之

豫章書

大厯七年春二月庚午江州水溢豫章大厯間仙鶴巢

於大果寺樹

安志

貞元元年嘉禾生洪州或五莖四穗或兩莖三穗

安志

年洪州火燔民居萬七千家

林志

十年夏四月江州溪

澗魚頭皆戴蚯蚓

豫章書

十一年星子來白鹿李渤馴

焉飼以自娛今白鹿書院因此名也

安志

永貞二年秋洪州火燔民舍七千家

安志

元和二年秋洪州大旱

安志

三年旱四年秋旱七年夏五

月饒撫虔吉信五州暴水虔尤甚平地有深至四丈

者

豫章書

高安城中火焚官舍民居甚多

安志

九年秋江

撫袁等州大水害稼

豫章書

十一年秋九月饒州大水

漂失四千七百戶

綱目

十五年六月十六日慶雲見袁

州西北至暮方散刺史韓愈以表圖稱賀

昌黎集

秋洪

吉信等州水

豫章書

有星隕於牙門將孔知讓第仰山

古廟獅鳳見

安志

長慶三年秋洪州螟蝗害稼八萬頃

豫章書

四年冬十一

月吉州大水

安志

寶歷元年秋旱

豫章書

太和四年大水鼠害稼八年秋水害禾

豫章書

大中間虔州刺史賈琮入覲駐旌遂興江口見州有五

色祥雲起因名萬安為五雲

林志

咸通七年白鹿見餘千萬年鄉以獻

豫章書

乾符六年歲星入南斗魁中黃巢陷餘干

餘干縣志

中和間瑞州昇元觀生瑞竹自根至三尺歧為兩竿

安志

光化三年十月太白鎮星合於南斗占曰吳越有兵是

時楊行密錢鏐稱兵

豫章書

天祐二年夏四月庚子有星類太上有光似彗長三四丈色如赭辛丑色如縞或曰五車之水星也時邑人盧光稠為本州防禦使尋加節度使兼制南雄韶州次年嶺南劉隱稱大彭王光稠與戰破之五車州之占候水者兵象也

上猶縣志

七年庚午夏洪州賈石於

越王山下昭仙觀前有聲如雷光彩五色濶十丈袁

吉江洪四州皆見觀前五色煙霧經月乃散

錄異唐記

末安福縣生蓮一莖四房時楊彥伯為宰

豫章書

後唐

同光二年洪州民生男豕首鶴足

安志

南唐

保大二年袁州火三年筠州州治火

安志

南唐間紫芝生

廬陵歐陽家屋楹

六一居士家譜

南唐時南昌新義里地陷

長數十步廣者數丈狹者七八尺

稽神錄

宋

開寶八年彗出五車色白長五尺是冬南唐亡

吳任臣
十國春秋

秋

太平興國二年饒州獲六目龜以獻七年江州水漲

豫章

書

雍熙二年虔州吏李祚家馬生駒足各有二距

安志

冬十

二月南康軍大雨雪厚三尺江水冰合可勝重載

綱目

淳化元年夏六月吉州大雨江漲丈三尺漂壞民田廬

舍江州水漲二丈八尺秋七月洪州江水漲壞城三

十堵漂民舍二千餘戶

豫章書

咸平元年夏六月大雨壞洪州城漂沒二千餘人

林志

七

年夏五月撫州修天慶觀解木有文如墨畫雲氣峰

巒人物衣冠之狀白雀二見餘干福應鄉異鹿見餘

干萬春鄉毛青如荷葉文白如梅花時縣令吳在本

有異政

豫章書

景德三年撫州獻白鳥有詔罷免歲貢四年信州飢

豫章

書

六年五月甲辰月犯南斗占曰大臣憂明年樞密

使王欽若罷欽若豫章人也

同上

大中祥符元年夏五月龍墜於餘干之李梅峯七日不起將屠之暴雨迅雷而去

安志

冬十二月甘露降上饒

縣三年春二月饒州獻芝草四本夏六月吉州臨江軍並江水泛溢害民田秋七月吉州言嘉蓮一莖二花袁州水漲墮州城四年秋七月洪江筠袁江漲沒民田六年春二月廬山崇聖院生芝九本知州王文

震以獻夏四月饒州承天院東山生紫芝四本蓮葉

豫章

書

天禧元年浮梁縣山竹生實如米四年冬十一月上饒

民王壽園中生芝草三本皆金暈其二連理

豫章書

景祐元年秋八月分寧縣大水漂沒民居死者三百七

十餘人

安志

袁州霪雨暴漲壞民廬舍官署圖籍倉庫

皆湮沒

林志

三年夏六月虔吉等州水溺死者賜其家

緡錢

豫章書

慶厯三年浮梁大水

林志

四年吉州甘露降夏五月乙亥

金溪縣得生金山重三百二十四兩五年秋八月洪

州章江禪院堂柱芝草生高一尺二寸葉二十一層

色白黃有紫暈旁生小芝葉九層上有氣如煙

豫章書

皇祐二年夏六月信州水破城沒官舍淹民居

林志

四年

甘露降吉州

仁宗實錄

嘉祐元年浮梁鄭夢龍園池生荷花一蒂雙萼

林志

治平元年洪州水

安志

熙寧元年秋九月撫州有白兔

豫章書

二年夏六月吉州

城西池生瑞蓮

林志

秋八月吉州玉虛觀生芝叢

安志

三

年夏六月己未饒州長山雨木子數畝狀類山芋子

味香而辛土人以為桂子又曰菩提子是年大稔

豫章

書

元豐元年芝草生南昌射圃

豫章書

二年袁州生嘉禾

安志

夏四月南康軍甘露降六月又降

豫章書

秋洪州稻已

獲再生皆實

安志

三年臨江軍芝生四十三本

豫章書

六

年八月吉州生芝草三十本是年芝二本生於州院
獄門之東又生於郡齋又生於西峯之秀野亭最異
者黃芝異本同穎時廬陵守魏綸有能名即秀野亭
以為三秀亭屬黃庭堅記之

黃山谷
文集

元祐元年宜春進士王忱家產粟二本四穗長尺餘司
理李冲元為瑞粟記

袁志

八年晉陵邵叶為新昌宰視

事之三月靈芝五色十二生於便坐之室

黃山谷
文集

建中靖國元年信州旱

豫章
書

大觀二年大旱夏六月至冬十月不雨豐城縣得古鐘

大小九具有篆文詔令進上

安志

秋八月瑞州木連理

大觀中甘露降瑞州時郡守曹坦四年夏六月瑞蓮

生袁州學西合村同莖駢花並實州守趙瑞記秋九

月右丞相張商英言袁州產瑞禾高踰九尺分布七

穗上瑞禾圖

豫章書

政和元年辛卯虔州生芝草仰山太平禪院產嘉穀

安志

政和間吉水李壽兄弟母墓在匡山木連理

豫章書

宣和間永豐曾正矩家池亭蓮一本而兩葩竹一幹而

兩竿

林志

六年袁州火

林志

建炎四年分寧縣治火

安志

十九年八月戊午月入南斗

次年信州盜起

豫章書

紹興初朱勝非出守江州過梁山龍入其舟纔長數寸

赤背綠腹白尾黑爪甲有聲目有光三年樂平旱撫

州祥符觀甘露降知州高衛繪圖以聞吉州飢令宣

諭使賑之四年筠州水害稼自夏及秋江西九州三

十七縣皆水

孫章書

七年饒州水壞城九年饒州大飢

林志

十三年秋七月玉山縣西七里居民謝七婦化為

牛十四年春正月樂平縣何衝里田隴數十百頃田
中水如為物所吸聚為一直行高平地數尺不假堤
防而水自行里南程氏家井水溢亦高數尺天矯如
長虹聲如雷穿牆毀樓二水鬪於杉墩且前且却約
十餘刻乃解各復故夏四月虔州民屋毀折柱木理
有字五其文曰天下太平時

綱目

秋八月撫州獻瑞粟

一本八穗一本九穗詔付史館十五年臨川禾生九穗州守晁謙之表聞乞付史館十九年夏四月甘露降江西路二十一年春二月辛未南安軍大雷電大庾令連潛初至吏人抱文書環立忽有黑氣晦冥咫尺不相視掣電震霆仆羣吏於地令悸甚匍匐案下少頃乃霽吏死者四人皆皆為經界司吏云是年饒州鄱陽縣石門民家籬竹生重萼牡丹又民家竈鼎生金色蓮花虔州亦有蓮同蒂異萼二十三年新喻

有巨室篋中時有火光燭衣帛過半而篋不焚

豫章書

二十五年湖口縣赤龍橫水中寒風怒濤覆舟數十

人多溺死

安志

冬十月以南安雙蓮花贛州瑞木信州

芝草並繪於旗

豫章書

二十七年洪州暨各郡大水

安志

是年鄱陽縣有妖鳥鳬身雞尾長喙方足赤目止於

民屋數日彈矢不能中亦羽孽也三十年春撫州宜

黃縣有大蛇見於丞治長二丈捕之縱數里外俄復

至者數四

豫章書

紹興間吉安王珠廬母墓有雙竹靈

芝之異甘露降浮梁李椿年母墓樹

林志

隆興元年春萍鄉池蓮一本三花是年袁州發解進士

四人萍鄉居其三州守趙瑋為圖

林志

時白鹿見南昌

三年秋八月積潦至九月禾稼皆腐隆興四縣為甚

四年秋七月饒信水六年夏五月大水八年臨江隆

興大水九年夏五月隆興吉饒信水圯民居壞田圩

豫章

書

乾道元年永寧寺池前大樹化為龍飛去

安志

二年六月

乙酉月入斗八月庚辰亦如之占女后憂十一月戊

午月犯權星占曰女后憂明年皇后夏氏崩夏氏宜

春人也

豫章書

四年夏六月隆興旱五年夏饒信大飢

民多流徙

豫章書

秋七月龍鬪於武寧縣西北大雨迅

雷二龍奔逝墮珠於復塘村為牧豎所得自是連年

水

安志

七年隆興江筠饒南康臨江首種不入冬不雨

秋江筠州隆興飢人食草實流徙淮甸發廩賑之不

給詔立勸分賞格內出左帑增賑饒州收育棄兒八

年隆興府江筠州臨江軍大旱九年吉贛臨江南安

久旱無麥苗浮梁大水隆興府鼠害稼千萬為羣甚

於螟蝗九年秋吉贛臨江南安皆螟

豫章書

淳熙元年飢賑以常平義廩六十二萬斛

豫章書

二年彭

澤馬當山羣狐掠人

安志

五年旱

豫章書

七年春三月不

雨大旱蝗民飢筠州大水淹沒田廬

安志

夏五月丙辰

分宜大水

林志

八年春江州飢

安志云諸郡大旱自正月至十月不雨

人

採葛而食詔罷守臣章驛饒州流徙入淮郡者萬餘

人夏五月江州水九年春德興縣民家有鏡自飛舞
與日光相射夏五月不雨至秋七月隆興吉撫筠袁
臨江建昌旱

豫章書

是年筠州無訟堂產瑞芝時趙謚

為太守十年鄱陽南鄉民生子兩肘有三臂長能鬪

六臂並運後不知所終

安志

秋八月信吉二州水十一

年夏四月不雨至秋八月吉贛建昌旱吉尤甚冬不
雨至明年二月十二年飢令帥臣賑粟十四年夏五
月隆興饒州江吉撫筠袁臨江建昌皆旱給度僧牒

鬻以糴米備賑十五年吉州治東池生雙蓮太守朱

希顏有記

豫章書

是年隆興府大水奉新尤甚淹沒八

百餘家

安志

十六年夏五月分宜水

豫章書

時廬陵三山

曾季淵家有合抱二木隔道株相連理

林志

紹熙四年吉州水漂沒民廬及泰和官舍自夏及秋江

西九州三十七縣皆水五年饒信江撫諸州水

豫章書

慶元元年樂平民產子人體有尾又民家生數豚而首

各備他獸形亦有人首者又更具他獸蹄又鄱陽民

家有一猫帶數十鼠行止食息皆同如母子相哺者
民殺猫而鼠舐其血鼠象盜猫職捕司盜廢職之象
也與唐龍朔洛州猫虎同占

豫章書

二年秋七月進賢

縣民產子首有角腋有肉翅面具三目有尾

安志

三年

夏四月饒州餘干民家生八豚其二為鹿樂平鄉田
家牛生犢一角鱗身肉尾農以不祥殺之或惜其為
麟同縣萬山牛生犢人首德興縣羣狐入民舍四年
夏五月不雨至七月旱六年饒信及江西郡國皆大

水自庚午至甲戌流民廬害稼

豫章書

嘉泰間金芝生廣昌縣廨三年秋七月水害苗稼四年

春撫袁隆興臨江大飢殍死者不可勝瘞有舉家二

十七人同赴溺者令郡縣發常平倉賑之部使者益

以緡粟

豫章書

開禧二年南康軍旱

豫章書

三年夏五月浮梁大水

林志

三

年二月癸丑月犯五車東南星占兵起駕道不通已

未火星退留守權星占女后有憂於是成肅太皇太

后崩

文獻
通考

嘉定元年夏五月甲子安福荆山民早出忽一星墜於
前亟掘地得之光彩燦燦毀為數十片亦如之二年
夏六月有年秋八月己巳信州火燔民廬二百家九
月丁酉吉州火燔五百餘家冬十月撫州火七年春
正月庚辰江州燈夕黑雲暴風暮作郡治遊人相踐
死於門者二十餘人八年南昌春旱首種不入至八
月乃雨樂平旱九年夏五月信饒大水流田廬害稼

豫章書

十年饒州大飢

林志

十四年旱吉贛建昌為甚十

五年夏五月不雨至七月贛州大旱十七年夏五月

建昌大水圯民廬城郭害稼

豫章書

金宣宗興定五年正月辛丑太白晝見於牛二百三十

有二日乃伏時司天夾谷德玉等奏以為臣強之象

請祭以禳之宣宗曰斗牛吳分蓋宋境也他國有災

吾何禳乎

王昕續文獻通考

紹定間產芝二本黃房紫萼十二層十六葉在饒州宣

聖殿

林志

四年秋九月建昌軍火

豫章書

端平元年夏六月朔大風雷屋瓦皆飛鳥獸驚駭豐城

縣晝晦大風雨雹吹瀕江廬舍於水人多溺死縣治

寺觀飄揚飛去帥守陳韓自劾於朝

安志

嘉熙四年夏六月江西大旱蝗

豫章書

淳祐元年甘露三降餘干孝子劉泌家梅樹

林志

十二年

信州飢

豫章書

寶祐元年夏六月江西旱

豫章書

咸熙五年夏五月有星孛於南斗

上猶縣志

七年春三月吉

州飢夏六月賑瑞州飢民

豫章書

十年春正月己卯朔

永新有氣如虹橫貫一邑

通鑑節要

元

至元二十五年秋八月萍鄉縣進嘉禾

豫章書

秋九月庚

子熒惑犯南斗時嶺南賊董賢舉兵剽掠韶雄南安

江西行省平章事呼圖特穆爾討之不克江西行樞

密使貢迪密實請益兵

上猶縣志

二十六年冬十二月寧

州生嘉禾二本州民張安世以進二十七年秋七月

龍興路水溢城幾沒賴吉袁瑞建撫皆水二十八年

撫州飢二十九年夏五月龍興路南昌新建進賢三

縣水

豫章書

元貞元年夏五月鄱陽餘干水二年夏六月泰和州蝗

豫章

書

大德元年夏五月龍興南康饒州水餘干山澤龍出凡

四五十舟行樹杪二年夏六月撫州崇仁縣新陂村

有星隕於地為綠色圓石邑人張椿以狀聞

豫章書秋

七月江西水

綱目

六年夏六月饒州大飢

林志

秋七月龍

興民訛言括童男女至有殺其子者命捕為首三人

誅之始息

綱目

七年夏五月龍興南康袁州撫州等路

南豐等州飢

豫章書

九月辛未熒惑犯南斗是年江西

飢

上猶縣志

九年夏六月龍興撫州臨川三路水十年春

正月湖口縣方丙妻甘氏一座四男夏六月龍興南

康蝗

豫章書

大德間餘干習泰鄉章雲西齋生竹一本

三幹

林志

大德間得銅鐘於進賢之上破山

安志

皇慶元年夏四月龍興路新建縣雨害稼二年冬十二

月德化縣災

豫章書

延祐元年秋八月龍興路水

安志

二年夏四月江州建昌

飢三年夏四月南豐州飢五月袁州飢四年秋七月

南城產嘉禾七年夏五月鄱陽進嘉禾一莖六穗

豫章

書

至治元年江州贛州霪雨二年冬十二月南康建昌大

水山崩三年秋八月袁州宜春縣隕霜害稼

豫章書

泰定元年春正月信州上饒飢夏五月贛州吉安臨江
飢秋八月江州建昌南安等路屬州縣飢九月建昌
早二年春正月瑞州飢三月江州飢夏四月南安飢
五月袁州撫州飢三年夏六月龍興路寧州高市火
燔五百餘家秋七月龍興奉新火冬十二月瑞州大
水壞民田五千五百頃廬舍八百九十所溺死者百
五十人四年秋八月龍興路火九月建昌贛州飢

豫章

書

致和元年春二月癸亥信州貢綠毛龜

豫章書

天歷二年秋八月饒州旱

豫章書

至順元年江西飢有田之家盡為餓殍

林志

元統元年冬十二月德興餘干樂平地震二年春二月

瑞州路水夏五月信州地震秋九月吉安路水南康

旱

豫章書

江州飢

安志

至元元年春三月龍興路飢冬十二月饒州地震二年

信州瑞州等路旱江撫袁瑞飢三年瑞州臨江南昌
新建飢四年春新昌州地震夏五月吉永豐大水六
月信州路靈山裂五年春二月信州雨土冬十一月
新昌州雨木冰十二月袁州飢

豫章書

至正三年大疫

林志

四年春正月靖安縣雨木冰五年瑞

州路飢

豫章書

六年進賢縣甘露降瑞州西澗書院生

靈芝瑞草

安志

八年夏四月奉新大雨雹傷禾折木九

年靖安山裂十年夏五月甲子寧州山崩丙寅上高

縣蒙山崩龍興瑞州大水十一年進賢生瑞竹南昌

新建大水

豫章書

夏大雨蛟出山崩餘干清湖水忽黃

而濁者三日

安志

七月己未太陰犯斗宿東第三星十

月辛己太陰犯斗宿距星乙酉太白犯斗宿西第二

星明年徐壽輝破江袁瑞饒信等州

豫章書

冬十月信

州雨忝饒州雨黑子大如忝菽民多取而食之

綱目十

二年春正月星隕於吉州城東北其光如火其聲如

雷夏四月龍興大疫十三年夏饒州龍興瑞州建昌

吉安大旱冬袁州路有黑氣環城

豫章書

十四年夏四

月江西大飢

綱目

冬龍興雨木冰

豫章書

十七年七月甲

申太陰入犯斗宿距星閏九月丙午太陰犯斗宿南

第三星明年陳友諒陷龍興

豫章書

十八年星隕於康

郎湖中焰曲如簾二十年春大雨雪連綿六十日二

十一年秋地震屋瓦皆鳴

安志

二十三年二月星隕康

郎湖中曳焰曲折袁準曰此枉矢星也主兵四月陳

友諒襲龍興七月明祖帥舟師二十萬救之大戰鄱

湖五日夜湖水盡赤

餘干縣志

明

洪武元年熒惑觸歲星寧州大風雨出蛟山水暴溢民多溺死詔遣使賑恤夏六月瑞州府地震二年饒州

霪雨三月水深丈餘城多傾圮

安志

三年芝生泰和縣

廳樑柱二莖狀如慶雲綢繆五色燦然光潤秋縣南

陳煥章家產芝三莖其色絢爛光彩奪目

林志

四年熒

惑留南斗是年胡廷美戰鉛山擊陳友定不克鉛民

大亂

廣信府志

六年癸丑冬十一月贛州民呂氏產白牡

丹於冰雪中盛開

豫章書

十三年夏五月瑞州大水新

昌泰和橋圯府城水三日

林志

三十年冬十一月瑞州

虎入城三十一年春大雨雹

安志

建文二年鄱陽大水

豫章書

永樂元年芝草生樂平二年饒州大水三年廣信大水

豫章書

四年廣信大水暴漲潁河之民遭決沒者甚衆

林志

五年撫州建昌疫至明年正月仍疫六年秋七月

玉山永豐疫冬十月上饒疫八年春三月吉永豐縣
學生員黃端家竹一本二幹十年夏袁州虎殺人僉
事黃翰為驅虎文禱於城隍之神自四月雨至五月
武寧大水漂沒民居令戶部撫恤十一年春二月豐
城德安建昌飢十三年秋七月瑞昌縣飢十四年廣
饒二府大水

豫章書

洪熙元年春二月饒州府地震秋七月又大震河水震

蕩屋瓦有聲

安志

宣德四年鄱陽火七年浮梁大水

豫章書

宣德六年熒惑犯南斗是年鉛山水大飢

廣信府志

宣德八年南昌饒州廣信南康九江大水九年南昌瑞

州臨江袁州撫州旱民飢

安志

白雀見南昌十年大飢

林志

正統三年夏五月芝生泰和儒學西齋如瑤瑜瓊玖精

英燦異

白下大記

十二年進賢瑞竹生十四年南昌大水

豫章書

湖口縣鐘山裂

安志

正統十四年七月熒惑入南斗先是鄧茂七聚衆寇汀州命尚書金濂寧陽侯陳懋等率江西兵討之是年茂七中流矢死衆擁其兄子伯孫為渠帥官軍討之

久乃克

上猶縣志

景泰三年冬至四年春瑞州凝雪六十餘日五年春二

月廣信大雨雪餘四十日

豫章書

天順元年浮梁大水二年夏四月瑞州大水山崩蛟出

八年夏四月袁州大水秀江橋圯

豫章書

成化元年秋七月大水詔戶部勘實以聞二年南昌旱

大庾產嘉禾

豫章書

三年夏南昌府屬三月不雨大無

禾四年寧都三江水合先是有三江合狀元來之謠

明年邑人董越果進士及第春三月豐城大風拔木

壞屋

安志

是年大旱免南昌等府衛官民田并山蕩屯

田秋糧子粒凡二百八十八萬六千三百餘石

豫章書

五年冬萬載縣東郊虎出噬人七年春武寧縣雨木

冰樂平縣大水

豫章書

八年瑞州大雨雹其大如拳

屋瓦皆碎秋大水新昌縣民姚永貞家產紫芝五本

安志

九年鄱陽火十年餘干大水

豫章書

歲甲午芝草生

豐城學夏瑞州府文廟產西瓜一莖七實其年登秋

榜者七人

林志

十二年浮梁大火

豫章書

十四年南康府

文廟產五色靈芝

安志

夏四月袁州大水

林志

十五年春

芝生大庾龍華山佛殿右柱太守張弼詩以紀之南

昌旱

豫章書

十六年湖口縣上鐘山崩十七年彭澤縣

大疫十八年南康府龍出於儒學泮池

安志

是年貴溪

水

豫章書

二十年春三月南瑞大雨雹夏四月撫州大

水傷稼二十一年臨江霪雨水漲四郊一壑

豫章書

是

年芝生奉新縣民家夏五月南昌大水漂沒民廬人

畜甚多浸城門五日方退

林志

是月吉安亦大水高十

餘丈漂沒田廬溺死者無算二十二年大庾大疫

豫章

書

夏大水決天井壩為河河在四十二都先是民家

天井中出二角似竹笋乃龍角也未幾水漲決為河

二十餘里今名天井壩

白下大記

弘治元年春正月奉新縣雨木冰

安志

秋七月廬山芝草

生有一本十餘莖者二年秋九月南昌鐵柱宮火

豫章

書

三年泰和天馬山鳴

白下大記

四年夏六月九江雨雹

六年春三月貴溪大雨雹形如馬首重十餘觔屋樹

鳥獸俱傷冬十二月南昌撫州大雨雪是年廬山白

鹿洞芝草盛生

安志

餘干火

豫章書

七年冬十一月地震

有聲

安志

是年袁州嚴寒林木枯摧人多凍死八年夏

瑞州旱高安楓樹結李實桃李皆花白魚躍入府城

浮橋上

林志

冬十月南贛大疫十二月大震電禮部以

聞

豫章書

十一年袁州臨江旱十二年春正月浮梁火

文廟譙樓皆燬

安志

是年餘干火十三年大庾大水十

四年甘露降分宜縣廨桐樹時知縣吳蘭芝生上高

縣廳三本知縣童旭覆以亭

豫章書

夏袁州萍實門外

池蓮一枝雙葩

林志

冬十月廣信雨麥十五年九江虎

晝入市三月間吞噬百餘民命知府募力士擒之隨

作文祭告城隍以杜民害

豫章書

二月十五年午時廣昌

地震如雷

林志

夏四月大庾大水是年南昌旱

豫章書

十

六年元日昧爽廣信有星流於東北秋八月樂平地

震

安志

冬十一月二十五日夜四更廣昌縣有星大如

輪自天中流抵東方天如開裂紅光燭地十二月朔

舊南門火是年袁州大旱十七年袁州袁山門外池

蓮一莖雙葩

豫章書

夏六月廬山鳴經三日雷電大雨

平地水湧丈餘蛟四出石崩數十處冬高安縣火

安志

十二月袁州分宜火燔民舍五千餘家儒學及安仁

驛皆燬

林志

十八年春分宜袁嶺白氣如虹上騰三日

豫章書

正德元年武寧縣火城內民居幾盡夏瑞州旱秋七月

大水袁州山崩九月餘干地震

安志

二年夏袁州大仰

門外池蓮三本同蒂異萼秋七月吉安雨血著衣皆

赤三年龍南雨雹如拳黑風捲屋牛馬多擊死黑青

自廣昌縣庫出至縣廳入於獄有聲如裂屋樂平旱

廣信自四月不雨至於十月金溪雨黑子如豆明年

臨川冠亂

豫章書

秋七月東鄉餘干雨黑黍瑞州竹生

花結實如米

安志

八月饒州後港蘿蔔菜葉如劍如旗

油菜結四實如鳥狀

豫章書

冬十月廣永豐水溢有聲

如潮

林志

四年廣信雨黑子如梧實袁州竹生花結米

飢民採之食樂平浮梁旱夏五月南昌大雨雹吉州

廣信自四月至冬不雨六月雷火焚廣昌縣儀門雨

雹交作南昌大水

豫章書

高安縣雨黑穀袁州臨江旱

安志

冬十二月廣昌縣復焚五年袁州樂平浮梁旱上

饒雨雹殺稼

豫章書

是年奉新靖安大飢春三月樂平

來一鳥九頭瑞州府城火

安志

夏五月南昌大飢民起

爲盜六月間有星大如盃光曜有芒日晡見於廣昌

縣西隅六年正月朔東鄉進賢地震

豫章書

十一日戌

時南豐地震

林志

夏廣信雨黑麥

豫章書

五年吉安府雨

血南昌見日有紅白暈中浮黑氣有頃始散

安志

六月

臨江旱是月四日夜有火星交流復有火球大如車

輪尾長數丈光焰灼天墮府城東北角夜分又有星

大如斗紅光燭城從西流至東南其聲隱隱如雷鳴
秋七月日晡有星如月流光燭地自廣昌縣南墜於

西北

豫章書

袁州監生韓繼善家石榴一蒂六實

林志

七

年廣信雨黑子人試種之出葉如戈戟三月餘干仙

居寨夜大雷電以西北風有火箭墮旗竿上如燈籠

光照四野戍卒因撼動其旗火直飛上竿首卒因發

銃衝之其火四散闔寨鎗首皆有光如星須臾滅冬

大庾火

豫章書

八年省城內外火災布政司治及民居

寺觀萬餘家

林志

南昌府旱夏六月豐城縣西南隕星

如斗火作累日燬官民廬舍死者三十餘人秋七月

又隕星如盆

安志

九月袁州府城火冬十月臨江府城

火南昌豐城火燬公署及民舍萬餘家十一月廣信

溪沼冰花宛如樹形九江湖口冰可通人行是年饒

州苦寒草木皆死浮梁雨雹小者如卵大者如瓜壞

民居田稼牛馬多死傷

豫章書

九年秋七月瑞州大水

山崩漂沒廬舍稻未刈者生秧八月朔南昌廣信晝

晦星見

豫章書

冬桃李花成實十年布政司治火寧州

雨木冰

安志

十一年春三月寧都通天村有合抱枯樹

偃仆已久忽風雨大作隱隱有聲頓起如故秋七月

贛州府城地震黑風四塞下黑子如竹實十二年春

南昌府象牙潭山裂三月餘干地震

豫章書

甘露降南

昌府學宮夏四月豐城地震六月南昌有火自空而

隕光焰長丈餘寧州東北方白氣如虹飛墮有聲秋

八月南昌火燬民居三百餘家冬十月浮梁虎入城

十三年夏六月有星自東南飛來其光燭天有聲浮

梁縣民余邱家產一牛二面三目三鼻十四年春九

江地震黑氣彌月始散

安志

夏南昌大旱自六月不雨

至八月十五年春吉水南山悟空寺生竹一本五幹

大庾縣火夏四月廣信大風雨雹殺飛走拔大木壞

廬舍五月又大水

豫章書

臨江府大水壞民田廬

林志

夏

五月暴風豐城有三龍見於楓樹橋

安志

六月丁丑廣

昌雨雪

豫章書

秋九月九江暴風龍開河小港女兒港

壞舟數百溺死商人無算

安志

十六年玉山山溪暴漲

勢若滔天漂蕩民居淹沒田土至有舉家沒溺無遺

者四月臨江疾風驟雨發木折屋平地水高丈餘蕩

塞田畝

林志

六月玉山分宜鄱陽水

豫章志

嘉靖元年饒州水

豫章志

夏四月萬載學宮雙虹見自南

竟北五日次年再見五月各府大水飢

安志

廣信霪雨

豫章志

六月大風拔木九月建昌地震有聲

安志

二年鄱

陽大飢餘干大疫

林志

夏四月玉山產麥一莖兩岐者

三十餘本

豫章書

冬十二月除夕饒州風雪大作平地

須臾尺餘飄入民居燈燭皆滅行李凍死相枕籍至

元旦下午方止

林志

四年南昌府屬飢高安縣學產並

頭蓮五年春正月九江府赤氣見是年十三府大旱

夏五月鄱陽德化多虎六年瑞州臨江水

安志

七年正

月元日甘露降贛州長泰巡撫汪鋐以聞

豫章書

八年

饒州廣信水十一年夏建昌蝗冬十二月南昌九江

雷十二年夏四月十三府大水秋七月吉安府西北

星隕如雨十三年春正月夜萬載火光燭天數刻乃

滅閏二月南昌進賢五色雲見瑞州府地震十四年

臨江府大旱次年又旱

安志

秋七月吉安水

豫章書

十六

年春正月豐城雨木冰十八年夏六月大水

安志

十九

年春三月大水

豫章書

夏四月瑞州民飢

安志

秋八月浮

梁大水

豫章書

二十年甘露降於豐城之蜜嶺

安志

二十

一年吉州大旱

豫章書

二十二年春正月朔南昌五色

雲見吉安大飢袁州城火延燒宣化樓二十三年正

月袁州又火焚秀江樓十三府旱大飢

安志

夏六月焚

惑犯南斗是年江西列郡皆飢明年大飢民多流散

上猶縣志

秋九月餘干大風拔木

饒州府志

二十四年春臨江

府大水無麥

安志

吉州大飢大疫贛州南安亦大疫夏

四月泰和土赤飯亦赤新城大水浸城堞漂官民房

屋千餘所田地二千餘畝男婦溺死者二千餘人

豫章

書

二十五年秋七月瑞金學泮池產鰮鯪二色白如

玉二十九年春瑞州雨雹傷稼四鄉稻秧俱盡夏五

月五老峰蛟出數百三十年破山來一彪似虎而大

毛體尖喙二日而噬十七人三十一年南昌旱民飢

安志 饒州四月不雨至九月

饒州府志

秋八月乙丑貢院火

豫章書

三十七年饒州獲白兔

府志

三十九年泰和天馬

山崩水湧出螺數石大者如拳未幾寇至居民被禍

獨慘

白下大記

春二月雨木冰撫州雨雹如石四十年春

三月大雨雪夏五月撫州見日光相盪

安志

饒州獲白

鴈

府志

四十一年夏四月至六月南昌數府大水四十

二年春二月建昌大疫

安志

饒州有牛腹大異常忽雷

電繞其身產犢如駒鱗角俱具後莫知所之

府志

四十

三年南昌府屬水次年飢

安志

隆慶二年南昌撫州旱民飢

安志

五年冬十月夜半天鼓

鳴六年德化彭澤雨雹大水

安志

萬厯元年秋七月贛州金魚坊井中醴泉出其氣清芬

味如薄酒三日乃竭三年南昌地震旱五年奉新雨

黑穀秋九月萬載縣有巨石自天而墮

安志

九月四日

有星曳於西南色赤如火少頃沒晦日彗星見西方

形如白雲勢若拖練根五丈餘闊三丈餘長約十丈

由尾歷箕越斗度牛至十一月二十九日乃止

南豐縣志

冬十月南安贛州桃李花大雷雨雹六年寧州雨黑

穀

安志

南豐大疫

縣志

七年八年皆旱

南豐縣志

七年進賢縣

崇禮鄉生嘉禾一莖五穗秋崇仁縣火延燒學宮三

日始息十年瑞州水

安志

十一年南安贛州吉安大水

南安太平橋崩溺死者以千計

豫章書

十二年彭澤塌

毛洲出火焚烈有聲以物投之即燃十四年春二月

瑞州大雷雨三黃嶺迸裂進賢鶴仙峯甘露降

安志

建

昌有巨蛇一角六足如雞距不噬人蛇六足者名肥

蠶見則千里內大旱後十六七年果大旱

明紀

十六年

南昌府雨豆或黑或斑味如銀杏

安志

撫州民飢秋七

月武寧縣雨雪九江府旱十七年春撫州建昌袁州

臨江瑞州五月不雨大飢秋七月大疫萍鄉五虎入

城瑞州荷山白鹿見十九年星子縣文昌閣來一鳥

似鸞

安志

二十四年水二十五年夏四月泰和疾風拔

樹壞屋秋八月各郡池水湧數尺高二十六年大水

豫章書

二十九年贛州城黑青見形似狸犬夜間潛入

人室燈燭皆滅邪氣觸人春二月建昌學宮桂開花

結子三十二年冬十月九日南昌地震南康獲白鹿

二三十三年春正月南昌府火延及布政司譙樓并

南昌縣治民居千有餘家夏五月雷火焚德勝門城

樓

安志

冬十二月龍見豐城田中身長四十餘丈頭似

麟七日後飛翔挾風雨而去

豫章書

三十六年南昌府

水大飢四十年瑞州大雨雹形似麒麟重一觔許四

十一年秋八月貴溪地震冬十二月寧都地震有聲

四十二年春廬山蛟出水湧猛虎入天池寺傷僧人

數衆四十三年九江羣鼠渡江而南食禾傷稼

安志

乙

卯夏六月安福王某自外歸有雲如匹練隨之入屋

化為白龍尾指天而首向下睛鬣角爪皆具王驚呼

家人環拜鄰舍喧傳聚看三四食頃滅

徐世溥雨禪新謳

四

十四年吉安大水民飢夏五月南安贛州淫雨蛟蜃

並出水湧丈餘四十六年夏九江星隕有聲秋九月

東南白氣見至初更即出兩旬始滅

安志

九月之杪東

南方蒼白氣一道闊尺餘約長丈二尺每五更出現

浹旬始滅靈臺占長庚星主兵屬楚分

贛州舊志

四十七

年德化甘泉鄉木連理生

安志

天啓元年辛酉春雨木冰

雨碑新編

二年秋九月太平宮蛟

出屋毀橋圯三年吉安府旱飢興安縣產紫芝夏五

月瑞昌華嶺山崩塞水口

安志

四年甲子夏大水

贛州府志

六年九江民邵本進妻趙氏一產三男高安虎四出

能上舟登樓開門破壁殺數十人

安志

六年贛州秋疫

贛州府志

崇禎元年秋九月自重陽後酷熱下旬尤甚廿九之午

暍不可言是夜無風自寒明日魚浮蔽江盡凍僵者

雨禱新匾

二年秋七月饒州府城火日數十發知府張有

譽開水巷及西門以壓之冬大飢

安志

四年辛未六月

廿一日東湖水鬪若有兩物在下推起中作噴湍

雨

新

秋七月十八日南昌及各府地震九月十六日天

鼓鳴冬十月十六日又地震五年夏六月二日袁州

雨黑穀人爭拾之以食七年春三月地震夏饒州大

水害稼八年春三月上饒雨雹大如雞卵夏五月暴

雨鍾靈橋圯

安志

九年南昌及各府大飢米穀騰貴鄉

城爭相搶奪巡撫解學龍禁之弗得後以數人正法

方止十年春雨木冰饒州有飛虎自西北來止於鄱

陽之義倉其狀虎頭鳥翼夏五月大水十一年冬餘

干冕山夜有光如火次年復見

安志

冬十二月十九日

大雪雷是歲有妖名馬狸精久之始滅雩都儒學東

齋榴樹下生芝一本十二朶如紫雲寶蓋

贛州府志

十四

年春正月大雨雪凝冰樹木凍折四山震響夏大水

民飢

安志

春二月興安大雨雹

廣信府志

秋七月十五夜信

豐地震冬十一月二十四日復震十五年郡城火

贛州

府志十六年春德興雨黑黍夏五月餘干東山石崩壞

民居

安志

冬十月興國雷震東方天裂數丈白光如電

興國縣志

十七年春二月袁州地震夏五月德興西河巨

石自起立轟然有聲秋七月異鳥叢集於九江其大

如鵝臨江雨黑沙

安志

是月二十六日會昌清溪山大

黃沙崩裂水湧出高二丈漂沒民居男婦溺死無算

贛州府志

冬十月初九日龍見隨有五彩雲擁護陷橫塘

一畝闊深十餘丈

廣信府志

國朝

順治二年乙酉廬山太乙觀生瑞芝九本三年丙戌夏

南昌暨各府自五月不雨至十月大旱四年丁亥春

大水斗米七錢民大飢

安志

夏四月日暮天門開於西

南見五色方丈如畫

彭澤縣志

五年戊子春夏大飢斗米

千錢

贛州府志

夏六月天門開於西北有文如前開閉有

聲

彭澤縣志

六年己丑春正月十一日九江晝晦如夜夏

四月大水

安志

八年辛卯春正月會昌地震

贛州府志

袁州

旱民飢

安志

三月廿五日大雷電謝文莊族裔一屋掇

去田中離舊址百餘丈而瓦壁盡完柱皆端正著礫

雨禪
新廬

九年壬辰春三月地震南康有虹墮於淳湖東

小池長可尋丈五色爛然經日始散

安志

十年癸巳夏

四月四日大雷電如拷桡者甚多如杯如拳如栗者

不啻霰集劉田之地墮一雹形如杵長一丈一尺有

奇

雨禪
新廬

十一年甲午袁州蟲害稼

安志

贛州城外善慶

菴產靈芝高二尺

贛州府志

十二年乙未湖口鄉民李茂

華妻謝氏一產三男

安志

十七年上饒縣署後堂棟間

產靈芝一本

廣信府志

十八年辛丑各府大水

安志

康熙元年壬寅祥雲見

贛州府志

南昌及各府旱

安志

五年丙

午夏四月牛產麟於南昌縣五十都三圖金臺里

劉思

彬集

七年戊申春三月雨雹夏六月地震有聲九年庚

戌冬十一月彌月大雨雪十年辛亥夏五月南昌數

月不雨大旱

安志

廣信府麥秀兩岐

廣信府志

十一年壬子

春民大飢道殣相望巡撫董衛國勘報奉

旨蠲免本年錢糧預發倉米賑濟

安志

十三年甲寅興國唐

村火死者三百三十七人

府志 贛州

十六年丁巳夏六月

瑞金朱大仁書室產芝二本

瑞金縣志

十七年戊午袁州

產麒麟

說鈴

秋寧州及各縣旱巡撫佟國禎勘報蠲賑

十八年己未秋南昌等五十九州縣旱巡撫安世鼎

勘報賑之贛州大水二十年辛酉夏新建等十四州

縣水巡撫李士禎勘報蠲賑二十一年壬戌春瑞金

松實路徑一里許甘露降四十餘日其味如蜜夏南

昌等十四縣水秋宜春等八縣旱巡撫佟康年勘報

蠲賑二十四年乙丑夏宜春萬安上饒鄱陽樂平五

縣旱災蠲賑

白志

二十五年丙寅廣信七邑水

廣信府志

二

十六年丁卯秋寧州等十七州縣旱賑之二十七年

戊辰秋寧州等十二州縣旱巡撫宋犖勘報蠲賑二

十八年己巳秋新建等四十一州縣旱蠲賑有差三

十年辛未夏永寧出蛟水決沙塞田二百餘頃秋瑞

昌水三十一年壬申夏上饒建昌二縣水賑之三十

二年癸酉夏新建等十四州縣旱巡撫馬如龍勘報

蠲賑三十四年乙亥秋新淦等一十二縣旱災賑之

白志 三十五年丙子鄆都學宮桂樹正月開花較盛於

秋雩都縣志 三十六年丁丑秋星子安義二縣旱明年夏

建昌水賑之南康府志 三十八年己卯贛縣水口山產紫

芝七莖高三尺許贛縣志 四十四年乙酉夏五月瑞金

山水陡發平地水高五丈城郭橋梁民廬官廨衝倒

過半瑞金縣志 夏新建豐城廬陵吉水四縣水巡撫卽廷

極勘報蠲賑四十五年丙戌夏清江新淦瑞金三縣

水賑之四十六年丁亥秋臨江府屬邑旱賑之

白志四

十九年庚寅夏四月興國官舍桑樹產芝大如盤徑

二尺色黃歷辛卯壬辰每初夏長一臺累三臺

贛州府志

五十一年壬辰秋廣信府屬大有

廣信府志

五十五年丙

申夏寧州武寧建昌水巡撫佟國勸勘報蠲賑五十

七年戊戌夏旱巡撫白潢禱雨即應歲有秋五十八

年己亥夏旱甚祈禱如前甘霖立沛秋大稔督學王

思訓作雨公亭記

白志

五十九年庚子大有六十年辛

丑大有年六十一年壬寅大有

雍正三年乙巳大有四年丙午南昌新建豐城進賢清

江新喻新淦建昌德化九縣秋禾水災奉

恩蠲免糧銀二萬六千三百兩有奇被災屯銀一百兩有

奇動支節備倉穀暨院司道公捐賑六年丁未上高

縣夏禾旱災蠲免糧銀三千二百兩有奇安仁縣秋

禾旱災蠲免糧銀二千五百兩有奇湖口縣藉田產

瑞禾一莖四穗七年己酉夏新建縣民周士義妻夏

氏一產三男五月大庾南康二縣大水奉

旨發帑銀四千六百兩布政使李蘭往賑秋彭澤縣民羅
翰聲妻宋氏一產三男八年庚戌大有春金溪縣民
謝叔恭妻徐氏一產三男七月萬載縣藉田民田產
瑞禾有雙根三穗者有三根雙穗者九月崇義縣產
瑞穀每穗有三百餘粒至四百餘粒者九年大有

江西通志卷一百七